

大佛頂如來密因修證了義諸菩薩萬行首楞嚴經卷第五

唐天竺沙門般刺蜜諦譯

大勢至法王子與其同倫五十二菩薩，即從座起，頂禮佛足，而白佛言：

「我憶往昔恒河沙劫，有佛出世，名無量光，十二如來，相繼一劫，其最後佛，名超日月光，彼佛教我念佛三昧。」

譬如有人，一專為憶，一人專忘，如是二人，若逢不逢，或見非見；二人相憶，二憶念深，如是乃至從生至生，同於形影，不相乖異。

十方如來，憐念眾生，如母憶子，若子逃逝，雖憶何為？子若憶母，如母憶時，母子歷生，不相違遠。

若眾生心，憶念佛，現前當來，必定見佛，去佛不遠，不假方便，自得心開。如染香人，身有香氣。此則名曰：香光莊嚴。

我本因地，以念佛心，入無生忍，今於此界，攝念佛人，歸於淨土。佛問圓通，我無選擇，都攝六根，淨念相繼，得三摩地，斯為第一！」